

Kyrjeklokka

Nr. 2 - 2014

Kyrkeblad for Hornindal, Innvik og Stryn prestegjeld

78. årgang



Seljumanna- messe

6. juli er dagen for årets Seljumannamesse. Prost Rolf Schanke Eikum skal tale, og St. Hallvardsguttene skal synge. Sistnemnde skal forresten også ha konsertar rundt omkring i fylket heile veka i forkant, anten åleine eller saman med andre. Les meir

om programmet på side 7.



Dugnad på kyrkjegardane

På fleire av kyrkjegardane er det tradisjon for å ha dugnad kvar vår. I Vikane er dei særskilte flinke å møte opp på desse dugnadskveldane. Her blir det utført arbeid både inne i kyrkja og ute på kyrkjegarden.

Kjellaug Skåden har godt handlag med messingpusen



Sommar- leirar

Kvar sommar blir det arrangert leirar på leirstadane våre. Her er leirar for ulike aldrar. Sjå programmet frå Nesholmen og Fjordly på siste sida.

Pinseoratoriet

Frå framføringa i Nedstryn kyrkje



Bjarte Sætre sitt verk vart framført i Nedstryn og Volda kyrkjer. Ei fantastisk oppleving, seier dei som var til stades. Les om dette på side 10

Mykje stoff frå Hornindal

Kvifor er det så mykje stoff frå Hornindal denne gongen, er det kanskje nokon som lurar på. Jau, det er fordi dei har gjort noko lurt. Dei har fått sett i gong ein komité som har fått i oppdrag å sende stoff til Kyrjeklokka.

Så dersom andre sokn vil at det skal kome meir stoff frå dei, er det ganske enkelt å berre følgje Hornindal sitt eksempel. Denne gongen er bladet utvida til 20 sider, og det er ikkje noko i vegen for at vi gjer det også framover. Så det er berre å sende inn mykje stoff også frå andre sokn.

Kyrkjeringen i Randabygda/Hopland

Som soknerådsleiar i Randabygd sokneråd har eg fylgt med arbeidet til kyrkjeringen i bygda. Den vart starta i mars 1983 og har vore organisert med eit styre og leiar. Møta har vore haldne på dagtid med handarbeid, god prat, mat og kaffi, andakt og song. Eg har hatt ståande invitasjon til møta. Her har eg både fått og gjeve informasjon og synspunkt. Desse kvinnene har gjort ein fenomenal innsats for bygda, kyrkja og det kyrkjelege arbeidet. Høgdepunktet har vore den årvisse kyrkjeringsbasaren med messe der handarbeid har vore selt og lodda ut. Desse samlingane har som regel innleia adventstida med gudsteneste først, så enkel middag og der nest messe/basar. Inntektene har i stor grad vore disponert av soknerådet og det er ikkje lite pengar det har blitt desse 30 åra; om lag 700.000 kr!

Mona Skrede, som var den første leiar, har skrive eit samandrag om kyrkje-



Her blir det laga betasupa.

ringen sitt arbeid med møteboka som kjelde. Eg vil la Kyrkjeklokka sine lesarar få ta del i slutten av dette samandraget.

«Kyrkjeringen har ikkje hatt medlemsliste og heller ikkje kontingent, men ein har hatt leiar og kasserar. Frå starten i 1983 til og med 87 var Mona Skrede leiar. Då overtok Randi Åland frå 88 – 91. Ingebjørg Nesdal hadde vervet i 92 – 97. Frå 98 – 2008: Mona Skrede. Bjørg Rand fekk leiarvervet frå 2009. Magda Tvinneim var kasserar frå starten og i alle fall i 20 år. Etter henne kom Klara Tvinneim og sist Marit Skrede. Det vart ei tøff leiar-tid for Bjørg. Ringen vart mindre og mindre. Nokon flytte til omsorgsbustad i Stryn, og mange døde i desse åra».

«Etter som alle vert eldre med åra – og ingen nye vil vere med så går det berre nedover, mot slutten. Dei flotte handarbeidsutstillingane med sal av varer tok slutt. Marknaden blir metta, og motar skif-



Førebuing av messe. Frå v. Mona Skrede, Marit Skrede og Britt Rand.

ter. Vi gjekk over til berre basar. Bjørg har vore ein stor bidragsytar med broderi på julemessene sidan ho vart med i kyrkjeringen. Ho er netthendt og nøyaktig. Slik fekk ho også i oppdrag frå soknerådet å brodere ny alterduk til kyrkja vår. Bjørg likar å arbeide med noko meningsfullt så ho takka ja til jobben og utførte den med glans. Bitte små korssting etter modell frå den gamle som var falma og sliten no. Den var i si tid brodert av Andrina Djuvstein».

«Vi veit at vi har utført oppgåvene vi tok på oss då kyrkjeringen starta opp. Vi takkar soknerådet for samarbeidet, og vi takkar bygdefolket, kyrkjeleg tilsette og andre for all hjelp og støtte. Med gode ønske for bygda vår og kyrkja, frå kyrkjeringen».

Tekst: Mona Skrede og Reidar Magne Sørland.

Foto: Reidar Magne Sørland



Samla til gudsteneste før mat og messe.

Misjonsarbeid i Hornindal

Det Norske Misjonsselskap er ein sjølvstendig organisasjon innanfor Den norske kyrkja. NMS samarbeider med kyrkjer på 4 kontinent og mange misjonærar arbeider for å realisere misjonsoppdraget som Den norske kyrkja driv. Dette skjer bl.a. ved eit utstrekt samarbeid med mange ulike misjonsforeiningar rundt om i Norge.

I Hornindal har misjonsforeininga for NMS og soknerådet eit tett samarbeid om Landsbyutvikling i Mali som bl.a. skal gje hjelp til befolkninga i Mali med å utnytte naturressursane og sikre matvarelager for både menneske og dyr ved bl.a. å byggje vatningsanlegg. I tillegg driv ein alfabetiseringskurs, fremjing av kvinner sine rettigheter og å stoppe praksisen med omskjering av unge jenter. Anslagsvis er berre 5 % av befolkninga i Mali kristne (herav kun 1/3 som er protestantar).

Diakoni, sosial innsats og forkynning av

den kristne budskapen er kjenneteikn ved NMS sitt misjonsarbeid, både ute og heime. I Hornindal samarbeider den lokale misjonsforeininga med soknerådet i høve bl.a. juletrefesten som vert avvikla første helga i januar kvart år på Hornindal omsorgssenter. Soknerådet har også bunde seg til å støtte arbeidet i Mali økonomisk (offer i kyrkja).

Hornindal misjonsforeining av NMS vart skipa i 1880 og kan om eitt års tid feire 135 års jubileum. Pr. i dag tel den 25 medlemmar som møtast 1 gong pr. mnd. rundt om i heimane, med unntak av sommaren. Totalt 9 gongar pr. år, der det i snitt møter 12-15 personar pr. gong. Aldersgruppa er godt vaksne kvinner. For at misjonsforeininga også i framtida skal vere ein del av foreiningslivet i Hornindal, er det behov for tilskot av yngre medlemmar.

Misjonsforeininga har det kjekt i lag. Ein

samlast over andakt, orientering om nytt frå misjonsmarka, kollekt og song. Ein god kopp kaffi og ein god «søgje» høyrer sjølv sagt med. Elin Ytrehorn har vore leiar av misjonsforeininga i Hornindal sidan 26.10.1993 og styrer arbeidet i foreininga med stø hand.

Kvart år i september har ein felles oppstartstemne i «Betania» i Stryn saman med foreiningane tilhøyrande Stryn, Innvik og Hornindal prestegjeld. Områdeutvalet for NMS arbeider nå også med å prøve å få til eit gjenbruksbutikk på Eid, men pr. 05.02.14 er dette ennå ikkje endeleg bestemt. Skal dette lukkast er ein avhengig av mange friviljuge som kan tenkje seg å ta vakter i butikken. Ta då gjerne kontakt med misjonsforeininga der du bur. I Hornindal kan Elin Ytrehorn kontaktast.

Tekst og foto: Elsa Aslaug Ommedal



Framme frå venstre: Karolina Kirkhorn, Helga Kirkhorn, Anne Solfrid Espe, Annlaug Hole Nygård, Anna Grodås, Pernille Tomasgard, Jofrid Lødemel, Maria Seljeset, Magnhild Haugen. Bak frå venstre: Ragnhild Lødøen og leiar Elin Ytrehorn.

Medarbeidarfest i Hornindal

Hornindal sokneråd har dei siste åra prøvd å skipe til medarbeidarfest for løna og uløna medarbeidarar i kyrkjelyden.

Som døme på uløna arbeid er trusopplæring i form av søndagsskule, diakonalt arbeid bl.a. i form av besøk med blomehelsing før jul til dei som har mist nokon av sine i året som er gått, opning og lukking av kyrkja om sommaren, klipping av plen/rydding på kyrkjegarden, måling og snekring av kyrkjebygg etter behov, basar, deltaking/ringing/speling på gudstenester og ved andakt på



Vikarprest Sigurd Stige (og kokk for kvelden) passar på å etterfylle med varm mat.

omsorgssenteret, anna dugnadsarbeid m.m.

Fredag 6. desember var det så duka for medarbeidarfest



Pinnekjøttet smaka fortreffelig. God «søgje» kring borda.

Til venstre: Delar av festlyden.

for å kunne vise både løna og uløna medarbeidarar at soknerådet verkeleg set pris på det arbeidet som vert utført i soknet. 41 personar deltok på festen.

Med vikarprest Sigurd Stige i spissen for opplegget var det duka for ein triveleg kveld prega av både alvor og skjemt. Menyen var som det høver seg i førjulstida; pinnekjøtt med alt tilbehør, kaffi og kaker. Rådsmannen vår, Ann Kristin Langeland, hadde kåseri. Nytilsett kateket for Stryn og Hornindal prestegjeld, Beate Nes, fortalde litt om seg sjølv og arbeidet sitt som kateket. Oliver Haugen fortalde frå turen sin til Mali i regi av Kirkens Nødhjelp og sokneråda i Nordfjord og Tiril Helgesen Haugen framførte vakker song. Alt var godt bunde saman av prest Sigurd Stige, som også hadde laga middagen. Nydeleg mat og kjekt program!

Takk til alle medarbeidarar for den flotte innsatsen de legg ned for kyrkja og kyrkjelydsarbeidet i Hornindal.

*Tekst og foto:
Elsa Aslaug Ommedal*



Dugnad i Innvik

Ein gong i året møtest ein trufast gjeng til dugnad i og utanfor kyrkja i Innvik, i år var det i alt 14 personar fra 6 år til spreke pensjonistar i sving.

Ein vårvask må kyrkja ha framfor store festdagar i mai, sølv og messing skal pussast slik at det blenkjer i vårsola!

Ute er det lauv og gammalt gras som rakast vekk, og i år var der også mykje kvist sidan ein del av trea har blitt "frisert".

Veret var dessverre litt surt etter at vi hadde hatt ei veke med sommartemperaturar, så utegjengen tykte nok det var

godt å kome inn til ein kaffipause. God prat, kake og kaffi gjorde godt etter arbeidsøkta, ikkje tvil om at dugnad også er sosialt!

I etterkant har også toalettavdelinga fått seg eit "løft" med måling av veggjar og golv.

Vi i soknerådet er glade for velvilje og flott dugnadsinnsats, tusen takk til alle som var med!

Tekst og foto: Bjørg Kvame, Innvik Sokneråd

Nokre av utegjengen i sving, Solveig Heggdal, Liv og Alf Drageset er trufaste dugnadsfolk !



Randi Bjørset gjev kyrkjebenkane ein tiltrengt vask.



Skinnet på altarringen får sitt årlege stell - der er Hildegerd Bjørlo eksperten.



Kyrkjeklokka

Bladet blir sendt til alle husstandar i Stryn og Hornindal kommunar.

Web: www.kyrkjeklokka.no

Redaktør for dette nummeret er:
Anna Marie Vatnamo,
post@kyrkjeklokka.no

Forretningsfører/abonnement/adresseendring:
John Selmer Skiftesvik,
6788 Olden, tlf. 99 02 80 76
john.skiftesvik@eninvest.net

Bankgiro 0538 18 51054
Bankgiro 3795 30 05108
Kontingenten er frivillig.
Vi takkar for betaling og støtte.

Kontortider, telefon, epost

Måndag er sokneprestane sin fridag.

INNVIK prestekontor
Tlf. 57 87 41 23
Mobil 911 84 241
Sokneprest Harald Runde
Kontortid:
Tysdag, torsdag og fredag kl. 10-12
Privat 57 87 41 15
runde.harald@gmail.com

STRYN prestekontor
Tlf. 57 87 98 12
Mobil 948 32 875
Sokneprest Knut Gjengedal
knut.gjengedal@stryn.kommune.no

HORNINDAL prestekontor
Tlf. 57 87 98 33
Mobil 942 76 335
Vikarprest fram til 31.07.
Sokneprest Mari Saltkjel frå 01.08.14.
Kontortid:
Måndag 8-15 og torsdag 9-13

KYRKJEVERJER
Stryn kommune
Lise Katrin Hetle
Tlf. 57 87 48 11
Mobil 913 27 882
lise.hetle@stryn.kommune.no

Hornindal kommune
Anne Lødemel Honningsvåg
Tlf. 57 87 98 34
Mobil 970 84 120
Måndag og torsdag 9-13
anne.honningsvag@hornindal.kommune.no

Kva er det du har i tankane i dag då? Du ser så spent ut?

Jon ser spørjande på kameraten sin – Tomas. Dei er på tur i det fine veret, dei to.

Du, i natt, eller like før eg vakna, hadde eg ein underleg draum. Den var så livaktig, nesten som eit syn. - Eg såg ein "mur", ikkje så høg, - eller var det ein veg? Den såg ut til å vere slett og fin. Og så brei at ein kunne gå på den, men berre ein åleine. Men på ein stad hadde nokre steinar ramla ned. Eg såg at det gjekk ein person på den, men skjøna ikkje kva dette skulle tyda. Vart liggande å gruble.

Kom du til ei løysing då? Eller var det ein vanleg draum. Det er så mykje rart ein både tenkjer og drøymer, veit du.

Ja, det veit eg vel - Men eg folte at det var noko meir, og kom til at det hadde med hendingar tidlegare i livet. Eg vart min eigen draumetydar. Trur du det går?

Ja, det trur eg, og slike menneske møter ein i blant. Men kva med muren din? Eller vegen om du vil?

Du skjønar, "muren" det er livsvegen til kvar enkelt av oss, - vegen der vi menneskja går. Oftast er den jamn og fin, slik såg denne og ut, men når eg såg nærmare etter så var muren likevel både knudrete og vanskeleg å gå på, ja endåtil var det fleire sprekker i den. Og det rare var at ein gjekk og gjekk, men kom liksom ikkje vidare. Og der nokre steinar hadde rasa ut datt denne personen. Ikkje var det så enkelt å reise seg att heller. Men gå på den måtte ein, på ein måte dømd til det. Eg har tenkt mykje på dette, Kan du sjå dette føre deg?

Eg er med, men må få litt tid til ettertanke. Dette er tankar eg ikkje har tenkt. Men du er nok komen lenger.

Det har eg kanskje i dette høvet. - Når eg ser meg rundt i "folkehavet" er der mange type menneskje, ulike - og unike. Vi må bære med oss "arven" vi har fått. Det er så lett å dømme dei andre etter som vi sjølve er, det vi er gode på skal dei andre og meistre. Og det som verre er, dei skal vere gode også på det vi har vanskar med. Vi ser lett det som kjem av fysiske, synlege manglar, men når vi kjem til det som har med psyka å gjere - eller skal vi seie sjelelivet - stoppar det opp. Det er kanskje ikkje å vente at eg som ein vanleg mann skal gje meg inn på slike spekuleringar, men visse tankar gjer dei seg nok dei fleste av oss. Ein slik brest i "muren" kan vere tung å bere, eller kome over.

Det er nok eit vanskeleg tema du har kome inn på no. Men vi må ha lov å tenke vi og, og vanleg sunt "bondevit" skal ein ikkje forakte er det sagt. Det er mange meiningar, også blant dei lærde, og det skifter frå tid til tid.

- Ja, det skal vere visst. Men til draumen. Det interessante var at di meir eg såg på den, dess fleire "murar" såg eg, somme nær, andre og langt borte. Nokre nærmast kraup på den, andre gjekk rakrygga og målretta. Så var det ein av dei rakrygga som brått steig ned der steinar var rasa ut. Og han streva svært for å kome på beina att. Etterpå var det som han var ein annen person. Måten han gjekk på fortalde sitt. Først eit hardt drag, så litt etter litt kom ei audmjuk haldning over han. Og eit mildare drag prega andletet.

Kva med deg, kom du inn i draumen?

- Ja, på ein måte gjorde eg det. Eg fekk mykje å tenke på. Og eg skal nok passe meg for å dømme so lett andre. Vi veit så lite om kva dei må bere på. Eg har tenkt over livet mitt på ein annan måte, og sett mine svake sider. Ja, eg skal seie deg, dei er ikkje små. Der er nok store breshtar her og. Men no får vi la tanken arbeide med dette, og heller take det att seinare.

Nokre dagar seinare møtte eg att Tomas, og han kom i samtale med meg.

- Du hugsar siste samtale, den om "muren". Eg har tenkt meir på den. Og eg har sett heile draumen om att. Eg såg ein person på ein annen "mur". Denne var litt lenger borte, men då eg "soma" den inn, såg eg tydeleg ein som streva veldig. Han meir kraup enn gjekk, og kom nesten ikkje av flekken. Så, med eitt var der ein kraftig, lys skikkelse bak han, men personen på muren merka han ikkje. Den lyse bøygde seg ned og spurde: - Treng du hjelp? - Å, ja svara han. Det er så vanskeleg, eg veit ikkje mi arme råd. Då tok "den lyse" han på armen og bar han over det vanskelege stykket. Så sa han: Rop på meg om du treng hjelp, og når du kjem til det siste hinderet, så kjem eg og ber deg over på den andre sida. Der er det alltid glede.

Men var det berre den eine som fekk hjelp?

- Eg såg berre denne eine, Men det var nok andre og som fekk hjelp. - Eller andre ville ikkje ta i mot hjelp? Vi menneska er ofte så stolte, vi vil greie oss sjølve. Og så er det denne forstanden vår som ofte kan vere meir til hinder enn til nytte. Likevel har nok mange fått hjelp, men dei veit vi lite om. Dessutan er det ikkje slik at vi går gjennom livet utan vanskar. Vi må nok alle bere på vårt.

- Det har du nok rett i. Eg og har ofte problem, men torer ikkje snakke om dei. Takk for at du delte dette med meg. Vi burde vere meir opne, og samtale om slike tankar vi ber på i det "indre rom". Så møtes vi på neste tur!

TG



Av Jon Ytrehorn

Tankar langs vegen ...



Hurra for borna – dei vekte interessa for Grunnlova!

17. mai i år vart spesiell. Nasjonaldagen vart feira med eit ekstra jubileum: Grunnlova var 200 år. Det var rett å la dette få ein sentral plass i 17. mai-feiringa landet over. Spesielt var det interessant å sjå kor aktivt borna tok del i førebuinga. I skular og barnehagar var grunnlova eit sentralt emne i vekene før nasjonaldagen. Eg vågar ein påstand: Borna veit no meir om grunnlova enn kva mange vaksne gjer!

I SKULAR OG BARNEHAGAR hang fargerike plakatar i raudt, kvitt og blått: "Barna si grunnlov". I frodige og festlege paragrafar hadde borna laga sin eigen variant av Eidsvollmennene sitt dokument. Lærarar og administrasjon fortener takk og ros for tid og innsats dei la ned. Borna lærte noko som dei formidla med iver og glede. Sjølv fekk eg oppleve dette under høgtidsgudstene i Randabygd kyrkje 17. mai. Alle elevane stilte opp og song med innleving og trøkk Henrik Wergelands "Vi ere en nasjon vi med" og Bjørnsons "Ja vi elsker", med høgre handa på brystet og flagg i handa. Det vart ei gripande stund!

GRUNNLOVA frå 1814 var banebrytande og la grunnlaget både for rettsstat og demokrati i landet vårt. Ho kom til ut frå ein mørk bakgrunn: Krigen mellom Noreg og Sverige i åra 1807 – 1814, ei følgje av Napoleonskrigane. Unge menn vart kalla inn til krigstene. Men ikkje alle kom tilbake. I mi heimbygd Hornindal var det åtte som miste livet, alle i alderen 21 – 30 år. Men dei fleste omkom ikkje i krigs-

handlingar, men på grunn av svolt, kulde, sjukdomar og elendige sanitære forhold. Det var ikkje berre på krigsmarka slike forhold rådde. Det var



***La takksemnda for fred
og fridom bli synleg
gjennom handlingar prega
av omsorg for kvarandre!***

naudsår over heile landet. Avlingane svikta, livstrugande sjukdomar greip om seg og la både store og små i grav. 33 born under 15 år i Hornindal døydde av svolt eller sjukdom desse åra!

I DAG har vi eit samfunn som legg vekt på tryggleik og sosial velferd for alle. Likevel er det mange born som lid, ofte i det stille. Årsakene er ikkje først og fremst materielle, dei ligg meir på det psykiske og sosiale planet. Born og unge blir hetsa på nettet. Andre blir haldne utanfor av gjengen. Mange slit med mindreverdskjensle på grunn av utsjånad og kroppsformer. Tal frå vida-regående skule viser at opp til 20 prosent av elevane slit med psykiske problem og treng hjelp og støtte. Dette er ei utfordring som vi må ta på fullt alvor.

MEN DET ER ein illusjon å tru at offentlege organ aleine kan løyse problemet. Her trengst det at vaksne engasjerer seg. Nokon må bry seg, sjå og lytte til born og unge sine stille signal som viser at dei slit. Nokon må handle. Derfor var det gledeleg å lese at det no er starta lokallag i Indre Nordfjord: "Vaksne for barn". Lokallaget er det første i Sogn og Fjordane, og samlar frivillige som vil gjere ein innsats når det

gjeld oppvekstvilkår og psykisk helse for born og unge. Ann Iren Ulvedal og medarbeidarane hennar i styret fortener ein skikkeleg blomst for initiativet dei har teke. Måtte tiltaket få brei oppslutning!

KRIGEN 1807-1814 kravde sine offer, også i bygdene våre. Unge gutar som vart kalla ut hadde draumar om ei framtid utan svolt, armod, pest og naud. Men mange fekk ikkje oppleve framtidsdraumen sin. Det gjer derimot vi som lever i dag. Vi bur i landet med dei goda dei drøymde om og kjempa for. - I 1940 vart ungdom på nytt kalla ut til kamp, denne gongen mot den tyske okkupasjonsmakta. Folket stod samla i draumen om ei framtid med fred og fridom. Fleire fekk ikkje oppleve denne framtidsdraumen oppfylt. Men det gjer vi som lever i dag!

SÅ LA OSS VISE vår takk i meir enn ord. La takksemnda for fred og fridom bli synleg gjennom handlingar prega av omsorg for kvarandre, ikkje minst for dei som i det stille ber på liding, tap og smerte. Slike omsorgshandlingar er i pakt med vår kristne og humanistiske arv som også grunnlova byggjer på. Også vårt sterkaste nasjonalsymbol, flagget, uttrykkjer denne arven. Midt i flagget står krossen som minner om Han som gav livet sitt for oss, så vi kunne eige kjelda til kjærleik og fred med kvarandre - og med vår Gud!

Jesu ord i Bergpreika:

Sæle dei som skaper fred.
Dei skal kallast Guds born.

Til ettertanke:

I dei 200 åra som har gått sidan grunnlova vart til har det ikkje vore krig mellom dei nordiske landa.

Seljumannamesse 2014

Seljumannamessedagen er 8. juli, og er til minne om Sankta Sunniva og Seljummennene, og kristninga av denne landsdelen. *Seljumannamessekomitéen* (SMMK) innbyr kvart år til gudsteneste i Selje kloster 8. juli, når dagen fell på ein søndag, og elles på ein søndag som ligg nær denne merkedagen. Det er ei uttalt målsetting å innby alle kristne kyrkjesamfunn. Vedtektene seier: "Gudstenesta skal ha eit økumenisk preg. Vi ønskjer å innby ulike kyrkjesamfunn til å vere med og aktivt ta del i ulike oppgåver."

Dette året hadde vi i god tid gjort avtale om og kunnngjort at Biskop i Oslo katolske bispedømme, Bernt Eidsvig, skulle vere predikant og hovudgjest. Ved ei mistyding hadde dette blitt gløymt i Oslo, og biskopen plassert på andre oppgåver i utlandet. Det betyr at vi likevel ikkje får besøk av biskop Eidsvig dette året, men vi har fått stadfesta lovnad om at han kjem i 2016!

Men Seljumannamesse blir det også i 2014. Vår eigen gode prost, Rolf Schanke Eikum, har vore velvilleg og lagt om sine planar, og tek på seg oppgåva som predikant. Dessutan har vi gjort avtale om deltaking i gudstenesta frå pinsekyrkjelyden *Filadelfia Stadlandet*, saman med prestar frå Nordfjord og Vanylven. Også i år blir St. Hallvard-guttene med i gudstenesta på Selja.

Konsertar

St. Hallvard-guttene, Salomos Høysangere, Ugler i Moseboken og Drops har eit stort konsertprogram som går frå søndag 29. juni til søndag 6. juli.

Programmet er slik:

Søndag 29.juni kl. 16.00: Lærdal.

St. Hallvard-guttene

Søndag 29.juni kl. 19.30: Solvorn.

St. Hallvard-guttene

Mandag 30. juni kl. 19.00: Florø.

St. Hallvard-guttene, Ugler i Moseboken, Salomos Høysangere

Tysdag 1. juli kl. 19.00: Bremanger.

St. Hallvard-guttene, Ugler i Moseboken,



Prost Rolf Scanke Eikum

Salomos Høysangere
Onsdag 2. juli kl. 19.00:
Sande kyrkje,

Sandsøy. *St. Hallvard-guttene*

Fredag 4. juli kl. 19.00:
Leikanger kyrkje.

St. Hallvard-guttene, Ugler i Moseboken, Salomos Høysangere, Drops

Laurdag 5.juli kl. 16.00:
St.Jetmund, Åheim.

St.Hallvard-guttene

Laurdag 5. juli kl.

19.00: Selje kyrkje.

St.Hallvard-guttene, Ugler i Moseboken, Salomos Høysangere og Drops

Søndag 6. juli kl. 17.30:

Loen kyrkje. *St.Hallvard-guttene*

Billett får ein kjøpe ved inngangen, men kan også kjøpast på førehand. *Coop Prix Selje* står for førehandssalet. Det er også råd å bestille pr e-post: selje@prix.coop.no.

Pilegrimsvandring på Selja

laurdag 5. juli

Pilegrimsvandringa blir også i år forenkla til ei vandring på øya. Tidsramma er slik: Kl. 09.15: Båt frå Selje til Bø (austsida av øya), og retur kl. 15.20: Båt frå Bø til Selje (kl. 15.30). Ein kvar tek med seg niste og høveleg kle og turutstyr. Pilegrimsvandringa blir leia av seniorprest Sigurd Ven-



gen. Pris: kr. 250 (båt-reise og deltakar-hefte), som ein betalar til Seljumannamesse, konto nr. 3845.07.12768.

Merk innbetalinga

med: *Pilegrimsvandring 2014*. Først når deltakaravgifta er betalt er påmeldinga gyldig. Påmelding til

sigurd.vengen@gmail.com innan måndag 30.06.14. Dei som melder seg på vil få eit svar med stadfesting og informasjon.

Gudstenesta i klosteret søndag

6. juli kl. 11.00

St. Hallvard-guttene deltek også i år ved gudstenesta, leia av sin dirigent Hans Martin Molvik. Prost Rolf Schanke Eikum preikar, og elles deltek prestar frå Nordfjord og Vanylven. Musikalsk leiar er organist Jon Inge Sigerland, Selje. Det blir takkoffer og nattverd. Båt går frå Nabben i Selje til Bø, på innsida av Selja, og med retur etter gudstenesta. NB! Sjå annonse for rutetider og prisar! Det blir selt billetter på Nabben før båt-avgang.

Seljumannamesse er ei regional samling for Nordfjord og Søre-Sunnmøre, og er skipa til av Nordfjord prostiråd, sokneråda i Selje og Vanylven sokneråd.

**Velkomen til Selja
- der kyrkja i Noreg vart fødd -**

Seljumannamessekomitéen

www.seljumannamesse.no



St. Hallvard-guttene på Selja.



Konfirmantar i Nordsida

Bak frå venstre: Stine Fjellkårsstad, Kateket Beate Nes, Anita-Helene Sollid.
Framme frå venstre: Tilde-Andrea Stensaker, Emma Nygaard Sætren, Sandra Anette Berglid.



Konfirmantar i Hornindal

Framme frå venstre: Hilde Løvlid, Iselin Malene Olsen, Malin Flåm Dahl, Ronja Simone Lundgård Hove, Ragnhild Seljeset, Mona Sofie Nygård Seljeset, Martine Mjåtveit Lødemel.
Midten frå venstre: Ina Malene Nygård Leite, Rolf Helge Lund Dahl, Geir Ola Lillestøl Tvinnereim, Erlend Sollid, Kateket Beate Nes, prest Sigurd Stige, Tollef Otterdal Heggen, Eskil Nordang Seljeset, Rolf Kåre Holmøy Østerbø, Annette Lillestøl.
Bak frå venstre: Jørgen Nygård, Bjørnar Taraldset, Egil Tronstad Myklebust, Håvard Andre Navelsaker, Steffen Nathan Hatlelid.



Konfirmantar i Olden

Framme frå venstre: Jens August Guddal Muri, Rebekka Gjertsen, Otelie Auflem Tenden, Ingrid Sofie Gjerde Myrvold, Mathias Melheim. Bak frå venstre: Kristian Rustøen, Thomas Tonning, prest Harald Runde, Rafael Nilos, Anette Beinnes.



Konfirmantar i Randabygda

Bak frå venstre: Runar Stensaker Tvinnereim, Kateket Beate Nes, Joar Olsen Skrede.
Framme frå venstre: Vegard Skrede, Ruben-Olai Takle Tytingvåg.



Konfirmantar i Innvik/Utvik

Framme frå venstre: Anders Gardshaug, Vilde Hammer Bergh, Karoline Eikenæs Hilde
Bak frå venstre: Ole Anton Lyslo, prest Harald Runde, Christel Hage (frå Utvik), Marte Skåden Aarreberg



Konfirmantar i Loen

Frå venstre: Ciril Westervik Myren, Frida Dragsund, Laura Liptacova.



Konfirmantar i Oppstryn

Bak frå venstre: Alf Erik Gjørven, Prest Knut Gjengedal, Kateket Beate Nes, Ingar Hjelle.
Midten frå venstre: Elisabeth Hamre Tunold, Benedikte Skaare Tjellaug, Elianne Fure Håvik.
Framme frå venstre: Vegard Glomnes, Aksel Mathias Meland

Foto: Alf Terje Glomnes

Konfirmantar i Nedstryn

Rad 1 (framme): Andrea Vinsrygg Steen, Eline Alden, Gudbjørg Alden, Josefine Gotteberg Egge, Ingrid Folven, Margrethe Skrede, Elise Mari Flore Frøholm, Jenny Løvdal Stauri, Christine Tøsse Humborstad, Gina Jun Egedahl
Rad 2: Ida Bjørnhaug Aarnes, Jenny Vik Skrede, Sigrid Langeland Grønmo, June Nedreberg Holmøy, Mathilde Yndestad Runshaug, kateket Beate Nes, Prest Knut Gjengedal, Maria Thaule, Ingrid Guddal, Madelen Vik Strand, Anne Eikenes Isehaug.
Rad 3: Kamutte Sunde Flo, Herman Hauge, Sindre Mulelid Hartvigsen, Kristoffer Sunde Haugen, Jan Åge Langeset, Erlend Slåtten Sandbakk, Tørstein Lunde, Aleksander



Nesdal Folkedal, Mathias Løkkebø Øvreseth, Espen Veum Stølen.

Rad 4: Adrian Nesje, Aleksander Mundal Olsen, Knut Andras Egge Hauken, Kristian

Gotteberg Egge, Magnus Arntsen, Albert Fure, Anders Flore.

Vegen til Pinseoratoriet

Bjarte Sætre har alltid vore glad i musikk. Faren kjøpte fleire instrument til borna då dei var små. Bjarte lærte seg å spele på fleire instrument. Etter kvart var det blokkfløyte, fiolin og piano han brukte mest. Han byrja tidleg å improvisere litt for seg sjølv. Det var spennande å leike seg med tonar og klangar. Då han var ten-åring skreiv han litt musikk.



Bjarte Sætre har komponert pinseoratoriet.

Bjarte tok musikkpedagogisk utdanning ved Griegakademiet, eller Bergen Musikkonservatorium som var namnet den gongen. Han hadde lyst å gå vidare og lære seg komposisjon, men det vart ikkje. Då han byrja ved Griegakademiet hadde han tenkt at piano skulle vere instrumentet hans, men så hadde han med blokkfløyta, og etter kvart vart han heilt hekta på det instrumentet. Det er kanskje eit uvanleg instrument å bruke innan klassisk musikk, men det er mykje musikk som kling fint på blokkfløyte. Helseproblem gjer at han ikkje kan spele blokkfløyte no. Det er og vanskeleg for han å spele fiolin, så det er pianoet han brukar mest.

På Griegakademiet lærte han ein del om komposisjon. Han heldt fram med å improvisere og han byrja komponere. Då han høyrde Bach Matteuspassjonen gjorde det eit sterkt inntrykk. Blandinga av bibelske tekstar og bruken av instrument, kor og solistar for å understreke teksten fasinerte han. Bodskapen var sterk, og det gav ein musikalsk vilje til å utfolde seg. Bjarte byrja sjå seg rundt etter pinsemusikk, og han fann ikkje at nokon har laga eit Pinseorium. Lysta til å lage eit slikt verk vart sterkare etter kvart, og for ca. 3 år sidan byrja han å organisere verket.

Han byrja med tekstane. Det heile starta før skapinga, og så har han plukka tekstar som er knytte til Bibelen frå start til slutt. Bjarte har hatt samarbeid med Jan Gudmund Skrivervik tidlegare, så han fekk han til å skrive nokre tekstar. Måten Jan Gudmund skriv tekstane på passar godt for Bjarte. Jan Gudmund har variasjon i versa og det gjer at Bjarte kan endre klangbildet og gjere det enkelte musikkstykket meir spennande. Bjarte likte dei utfordringane dette gav, og han følte han fekk utfolde seg



Frå framføringa

i eit ledig klangbilde. Han får utnytte enkelt instrument, instrumentgrupper og kor. Bjarte likar å nytte kjende tekstar og kjend musikk, men som han seier: "Eg maltrakterar både tekstane og musikken". At han "leikar" seg med tekstane og musikken fører til at publikum føler dei kjenner seg att samstundes som dei vert ført inn i noko nytt og spennande som er svært vakkert.

Når han kom så langt at Pinseoratoriet var klart for framføring, var Bjarte svært nøgd med at Magnar Åm ville vere dirigent. Tidlegare har dei hatt litt samarbeid, og det er godt å kjenne kvarandre når eit så stort verk skal framførast. Det var ei utfordring å setje saman eit orkester, men han fekk alt på plass til slutt. For Magnar var det ei utfordring å skulle dirigere så mange musikarar og songarar som ikkje syng og spelar saman til van-

leg, men han tykte det gjekk seg godt til etter kvart.

Bjarte legg vekt på at han har hatt nokre gode hjelparar. Tore Bøe har vore til uvurdereleg hjelp i heile prosessen. Når det gjeld den praktiske tilrettelegginga siste året, har Turid Tryggestad Espe og Nils Petter Lillestøl vore til stor hjelp.

Framføringa 10. og 11. mai i Stryn kyrkje og Volda kyrkje er både Bjarte Sætre og Magnar Åm godt nøgde med. For oss som var med, var det ei fantastisk oppleving.

Så er det slik at slutten på Pinseoratoriet er ikkje skriven enno, så kanskje vi om nokre år får høve til å høyre dette mektige verket ein gong til.

Tekst: Brynhild Lund Notøy

Foto: Ole Sætre Eltvik



Takk til aktørane.

Oddny under open himmel

Kveitekornet si lov

Vi har opplevd ein ny vår. Ein berr og mild etterjulsvinter var som ein lang vår, men så kom snøfallet midt i mars. Snø-klokker og krokus hadde blomstra ein heil månad. Tulipanlauva var komne langt opp, men dei tolde snøen.

Det var kvitt på bøen. Eg sat i stova og høyrde radiogudstenestea. Utanfor stoveglaset oppdaga eg eit skjorepar. Den eine hadde ein kvist i nebbet. Dei var i fullt arbeid med reirbygging eller reparasjon av det gamle. Eit nytt vårteikn, tenkte eg.

Så har eg fått følgt med det som skjer i naturen også denne våren. Nye knuppar på trea kom. Nokre vart til nye greiner og andre til blomstrar. Underleg kor det er uttenkt og planlagt. Mange har lagt frø i jorda inne eller ute for å få nye plantar. Etter nokre dagar ydda det fram spirar. Den vesle kimen var levedyktig. Det

skjedde mirakel dag for dag.

På ein tur i slutten av august sist haust reiste eg gjennom bygder med store korn-åkrar. Det var eit vakkert syn. Dei stod der som gule hav av aks med fullmodne korn. I min barndom var der også slike åkrar i bygdene våre. På heimturen såg eg at bønder var byrja å hauste kornet. Det vart til mat for menneske og dyr, men ein del vart teke vare på til nytt såkorn.

Ordet om kveitekornet i Joh. 12,24 har stege for meg denne våren. "Sanneleg, sanneleg, det seier eg dykk: Fell ikkje kveitekornet i jorda og døyr, er og vert det berre eit korn. Men døyr det, gjev det stor grøde."

Vi legg kornet og andre frø i jorda. Der går det for seg ein nedbrytingsprosess og på same tid ein livsprosess der det vert



skapt nye plantar. Begge deler er nødvendig for at naturen skal

fornyast og bere frukt.

Vi har feira påske og pinse. Påske- og pinse-bodskapen handlar om død, frelse, nytt liv og kraft. Kveitekornet er bilde på Jesu død og gravferd. Frukta er Jesu oppstode og verdsmissjonen. Frå ei likning veit vi at såkornet er Guds ord. Det må såast – høyrast – takast vare på for at det skal bere frukt. Det har i seg ei kraft som sprengjer tanken og fornufta si grense, og ei tru overtek. Lat oss ta imot Ordet i eit vent og godt hjarte, og lat oss stå saman om sårbeidet! Må det gro og vekse i vårt eige land og vidare utover i verda!"

Blomsterbed ved Hornindal kyrkje

Hornindal sokneråd har i nokre år nå hatt samarbeid med Hornindal barnehage i høve planting og stell av blomsterbed ved kyrkja. Soknerådet kjøper inn plantar og barnehageborna tar seg av resten. Hornindal barnehage har dette som eit ledd i sitt miljøfyrtårnprosjekt. Hornindal er så heldige å ha både dugande medarbeidarar på kyrkjegarden og samarbeid med dei små borna, som totalt sett gjer at vi kan ha det velstelt og triveleg rundt kyrkja.

Hjarteleg takk til barn og vaksne i Hornindal barnehage for godt samarbeid og flott arbeid!



Over frå venstre: Eldar Ekblom Lillestøl, Jon Eirik Navelsaker, Jamie Hellesø Hawkins, Erling Hesholm Kroken, David Nistad Faulk, Kamutte Øen, Jonas Hjellbakk Hole, Elias Hjellbakk, Selma Hove Sollid, Leon Øen, Elisebeth Lødemel, Sina Pauline Nesdal, Cecilie Lødemel.

Til venstre: Jonas Hjellbakk Hole.

Til høgre: Jon Eirik Navelsaker.



Salmen min



Ragnhild Lødøen

Eg vart utfordra av Svein Sindre å skrive om min salme. Svein var tidlegare kollega av mannen min, Rasmus, og meg på Hornindal skule. No er Rasmus på Hornindal Omsorgssenter, og Svein er god besøksvenn.

Det finst så mange gode salmar. Ikkje utan grunn snakkar vi om «salmeskatten». Alder og livssituasjon kan vere avgjerande for kva salme ein tykkjer best om. «Salmen skal låne ord til menneska» (M.B. Landstad). Eg hugsar salmar frå barndommen og min ungdomssalme. I den seinare tid har eg blitt glad i salmane til Svein Ellingsen. Ellingsen er både biletkunstnar og salmediktar. Av nolevande salmedikttrar er det han som har fått flest salmar trykt i den nye salmeboka frå 2013. Eg vil nemne salmen «Fylt av glede over livets under» og «Noen må våke i verdens natt». I eit intervju seier han at han sjølv kanskje er mest glad i «Døden må vike for gudsrikets krefter».

For ein god el år tilbake var Rasmus og eg saman med andre nordfjordingar ute på

Stårheim der Svein Ellingsen las og fortalde om salmane sine. Då las han m.a.

denne salmen som eg har valt «Livets grunntone. Salme i eldre år» Då eg etterpå spurde kvar eg kunne finne salmen, fortalde han at diktet enno ikkje var utgitt. Men han ville sende det til oss. Og vi fekk det i posten med namn og adresse kunstnarleg skrive!

I mange år var denne salmen «vår» salme, ein lesesalme. Men no er salmen komen med i den nye salmeboka på nr 852 med tone av Knut Nystedt. Det er takksemnda over livet eg tykkjer forfattaren uttrykkjer så vakkert. Han skriv så enkelt og forståeleg at noko meir forklaring trengst ikkje. Godt at det finst diktarar som kan setje ord på det vi andre kan erfare!

Eg utfordrar Rådmannen i Hornindal, Ann Kristin Langeland, til å skrive om sin salme i neste nummer av Kyrkjeklokka.

Livets grunntone - Salme i eldre år

*En tone skal stige i livsdagens kveld
med klang fra vårt hjertelivs grunn
Så snart er vår tilmålte tid på hell,
Så kort er vår jordiske stund.*

*Men tonen skal høres i glede og savn,
så lenge vi lever på jord;
En lovsang til livet er tonens navn,
Den synger i alle som tror.*

*Takknemlighet fyller vårt hjerte og sinn,
Ved tanken på dager som svant,
Og minnene står i forklaret skinn
Fra alle de gleder vi fant.*

*Vår takk går til Gud for det liv vi har levd,
for alle velsignede år,
for vennskap som trofast ble holdt i hevd,
for hjelp under skiftende kår.*

*Fra avmakt til håp har du ledet oss, Gud
de dager vår livskraft var brutt,
Hver demring som opprant, bar i seg bud
Om lyset som seiret til slutt.*

*Ja, vinter og frost ble beseiret av vår,
Du fylte vårt hjerte med sang,
Hvert år i vårt liv ble et nådens år
Med overflod gitt oss i fang.*

*Vi er i din omsorg fra vugge til grav,
Du leder oss fram på din vei.
Vi takker deg Herre, for alt det du gav!
O Gud vi er alltid hos deg*

Framhald frå side 13

Kva syns du kyrkje og bedehus kan gjere betre for å framelske tru og Jesus-etterfylgjing hos dei unge?

- Det blir allereie gjort mykje bra trusopp-læring i både kyrkje og bedehus! Og det er heldigvis berre Jesus sjølv som kan skape tru og eit ønske om etterfylgjing, så det viktigaste vi kan gjere for dei unge er å vise vegen til Han. Elles trur eg det er viktig å knytte trua til livet

her og no, slik at dei unge opplever kristen tru som noko livsnært og relevant.

De er no ein familie på fire. Frå mors-perspektivet, korleis ser du på storsamfunnet, lokalmiljøet som borna dine skal vekse opp i? Av det du ser, kva gjer deg glad og kva gjer deg bekymra?

-Når eg tenkjer på samfunnet borna våre skal vekse opp i, er eg takksam for alle dei moglegheitene og rettane dei

har ved å vere fødd inn i det norske samfunnet. Med tanke på korleis livet er for mange born i andre delar av verda, ser eg at vi som foreldre har mykje å vere takksame for.

- Noko av det som bekymrar meg med tanke på storsamfunnet, er fokuset på vurdering og prestasjon, og tendensen til å framelske det tilsynelatande perfekte. Dei som veks opp i dag kan nok kjenne at dei må prestere på mange felt, t.d. i forhold til skule/karakterar,

utsjånad, fritidsaktivitetar, venner m.m. for å vere gode nok. Som forelder synest eg noko av det viktigaste vi kan formidle til borna våre er at dei er gode nok som dei er, og verdfulle i seg sjølve.

*Intervju v/ Jan Gudmund
Skrivervik
Foto: Privat*

Kyrkjelydspedagog Ann-Elin Aabrekk Lie

Ann-Elin Aabrekk Lie er 28 år og er gift med Kenneth Lie. Dei har to born. Ho har sidan januar 2014 vore kyrkjelydspedagog i trusopplæringa i Stryn kommune. Ho er no på gamle tomstar sidan ho vaks opp i Olden. Ho har ein eldre og ein yngre bror. Kyrkjeklokka har stilt henne nokre spørsmål om bakgrunn, jobb-historie og kva som førte henne og familien tilbake til Olden. Og kva tankar gjer ho seg om å jobbe med ungdom og det å vere mor til to born.

- Eg tok sosionomutdanninga mi ved Høgskulen i Bergen, var ferdig utdanna våren 2009. Etter dette jobba eg ein kort periode som miljøterapeut ved eit bufellesskap for autistar, før eg fekk jobb som sosialkurator ved eit NAV-kontor i Bergen, ein spennande og interessant etat å jobbe i. Eg arbeida der fram til vi fekk vårt første barn i januar 2012, og sommaren same året flytta vi til Olden. I første omgang skulle vi bu her eit "prøveår" men vi trivdest så godt at vi valde å bli buande.

Var det enkelt, tydeleg at den utdanninga du valde var rett for deg? Eller søkte du på fleire felt og let dei dørene som opna seg vere styrande?

- Etter at eg var ferdig på videregående, gjekk eitt år på Gå Ut Senteret i Hurdal. Saman med tre andre var eg på team i 5 mnd i Israel og dei palestinske sjølvstyremråda. Noko av det vi gjorde, var å arbeide på eit krisesenter for kvinner og born i Tel Aviv. Eg syntest dette var særleg givande, og det medverka nok til at eg valde å søke på ei utdanning der eg fekk høve til å hjelpe folk. Året etter byrja eg på sosionomutdanninga i Bergen. Det var heller litt tilfeldig at eg valde dette yrket, men i etterkant er eg glad for å ha tatt nettopp denne utdanninga. Eg har alltid hatt eit



Her er heile familien samla. Frå venstre: Kenneth, Mathea, Ann-Elin og Elina.

ønske om å arbeide med mennesker, og med sosionomutdanninga får eg høve til å gjere det på ulike måtar.

Kva faktorar var viktigast då de valde å flytte til Olden?

- Det var mellom anna nærleik til familie. Eg hadde lenge hatt lyst å flytte heim til Nordfjord, og då eg skulle ha morspermisjon såg vi det som eit høve til å prøve ut korleis det var å bu i Olden eitt år. Når mannen min i tillegg fekk jobb i Olden, bestemte vi oss for å flytte. Vi set også stor pris på naturen og friluftsmoglegheitene i Nordfjord, så dette var jo også noko av det som drog oss hit.

Kva er det beste ved å vere ung familie på landet samanlikna med byen? Kva saknar de mest?

- Det beste med å vere ung familie på landet er dei litt role-

gare rammene rundt kvardagslivet; ein slepp rustrafikk og støy m.m. Elles er vi ein familie som likar å vere ute og gå på tur i fjellet, noko vi har gode høve til her. Vi saknar nok til tider mangfoldet i byen og alle moglegheitene der.

Kva er kjekkast, mest utbytte-rikt og mest utfordrande med å jobbe som kyrkjelydspedagog i trusopplæring i Stryn kommune?

- Det beste med å jobbe som kyrkjelydspedagog er å få vere ilag med dei kjekke borna og ungdomane i Indre Nordfjord! Å kunne få spele på lag med så dyktige og engasjerte kollegaer og frivillige er også noko av det som gjer arbeidet meningsfullt, det er godt å vere ein del av eit team som arbeider saman om trusopplæringa i regionen.

Korleis vil du beskrive 14-15 åringane som veks opp i dag?

Kva er det same og kva er forskjellig frå du sjølv var i den alderen?

- 14-15 åringane som veks opp i dag har eg eit positivt inntrykk av. Eg opplever dei som reflekterte og engasjerte, fulle av liv og lyst, i ei spennande brytningstid i livet. Dei er opptatt av det som skjer i lokalsamfunnet og ute i verda, og har mange tankar om dei store spørsmåla i livet. Mykje er nok likt frå eg sjølv var i den alderen, men eg trur ungdomane i dag har mykje meir informasjon å forholde seg til på fleire arenaer. Ein har ulike sosiale medier å delta på, og ein nyttar internett/data og mobiltelefonar i mykje større grad enn då eg sjølv var i den alderen. Dette reiser nok ein del andre problemstillingar og utfordringar enn eg sjølv måtte forholde meg til.

Framhald side 12

Kristin Lødøen Hope ordinert til prest

Søndag 23. mars vart Kristin Lødøen Hope ordinert til prest. Den høgtidssame hendinga gjekk føre seg i Fridalen kirke i Bergen. Biskop Halvor Nordhaug var glad for å kunne ordinere nettopp Kristin til preste-teneste i Den norske Kyrkja.

Kristin er opprinneleg frå Hornindal, men ho bur saman med familien sin i Bergen. Kristin har teke siste året av preste-utdanninga i vaksen alder og har vore student ved sidan av jobben som rådgjevar på bispedømekontoret i Bjørgvin.

Ordinasjonsgudstenesta i Fridalen kyrkje vart ei høgtidssam stund, både for Kristin, familie, vener og kyrkjelyden. Gudstenesta var prega av mykje sang og



Kristin Lødøen Hope held si første preike etter at ho er ordinert.



Kristin Lødøen Hope blir bedt for

musikk. Kristin hadde der si fyrste preike som ordinert prest, og preika over Luk. 1,26-38.

I tida framover vil Kristin vere i teneste som vikarprest i Fjell menighet på Sotra utanfor Bergen.

Vi ynskjer Kristin alt godt i ei stor og viktig teneste framover.

Foto: Lars Kvalbein

Gripande gudstenesteinns slag av Isabell

Den årlege gudstenesta for og med funksjonshemma i Indre Nordfjord var i år lagt til Nordsida kyrkje søndag 6. april. Unge og vaksne, dei fleste frå Arbeidssenteret i Stryn, deltok med ulike oppgåver: Song, tekstlesing, lysark med teikningar frå påskebodskapen i Bibelen og enkle liturgiske innslag. Dette hadde dei førebudd under den sosiale samlinga med leiarane dagen før i Betania, Stryn.

På biletet ser vi Isabell Andersen som avslutta gudstenesta med eit opptrinn ho sjølv hadde utvikla, framført til musikk ho sjølv hadde valt ut. Framfor alteret lyfter ho hendene både til lovprising av Herren og velsigning av kyrkjelyden. Ei vakker og gripande avslutning av gudstenestedelen. Dagen heldt fram med kyrkjekaffi saman med kyrkjelyden.

Stor takk til alle frå Arbeidssenteret i Stryn for den fine og friske måten de med-



verka i gudstenesta på. Varm takk til Heimenesta i Stryn for god hjelp og medverknad dei to dagane.

Takk også til Nordsida sokneråd ved Diakoniutvalet og til medarbeidarar knytt til Betania for fin gjennomføring av praktiske tenester under Kyrkjehelg for og med funksjonshemma 2014. Nemnast bør og Magne Kristiansen som gjorde preika ekstra levande ved å teikne hendingane frå Jesu siste påske i Jerusalem samstundes som han fortalde.

Slikt vil bli hugsa!

**Helsing Erling Tronvik
og Jon Ytrehorn (leiarar)**

Foto: Karin Sæten



Slekt
skal følgje
slekters
gang



Oppstryn

Døypte:
4/5 Anders Kirkeeide Sunde.
For. Kari Ann Kirkeeide og Arvid
Kåre Sunde

Døde:
18/2 Gjertru Greidung f. 1920
16/3 Odlaug Erdal f. 1917
22/4 Lars R. Greidung f. 1923

Nedstryn

Døypte:
23/3 Emil Bjørlo Sandbakk.
For. Hege Bjørlo Sandbakk og
Frank-Jakob Sandbakk
13/4 Liva Fannemel Vik.
For. Anne Siri Vik og Sindre
Elvegård Fannemel
13/4 Silas Berge-Flataker.
For. Sigrid Berge og Ståle Flataker
17/4 Fritjof Fure. For. Anita Vinsrygg
og Asbjørn Fure
27/4 Noah Seljeset Svarstad.
For. Samuline Beate Seljeset og
Sjur Ole Svarstad
11/5 Aksel Frøysa Bernhoft.
For. Silje Kristin Frøysa og Kjetil
André Kirkeeide Bernhoft

Døde:
1/3 Møyfrid Sæten f. 1932
5/3 Henny Olaus Risøy f. 1944
23/4 Leif Karlsbakk f. 1939
26/4 Per Aleksander Vollen f. 1939
29/4 Arne Harald Vik f. 1943
19/5 Sverre Andreas Bringsvor f. 1918

Loen

Døypte:
16/3 Olivia Opheim Flåten.
For. Silje-Katrin Opheim
og Erik Flo Flåten
16/3 Viljar Sande Hogrenning.
For. Elin Sande Beinnes
og Geir Hogrenning
21/4 Ane Sofie Svarstad Baade.
For. Jeanette Svarstad og Thomas
Baade

Døde:
1/5 Reidun Loen f. 1926

Hornindal

Døypte:
2/3 Martine Melvoll Muldsvor.
For. Agnete Melvoll og Øyvind
Muldsvor.
Døpt i Sunnlyven kyrkje.
20/4 Ingrid Elise Svor.
For. Berit Wiedner
og Rasmus André Svor
20/4 Andris Flore.
For. Ingrid Randi Wangensteen
Flore og Jan Bakke Flore

Døde:
11/3 Oddvin Arne Engebø f. 1936
3/4 Oddny Marie Maurset f. 1921
11/4 Aslaug Haldis Solvik f. 1926
12/5 Pål Alfred Tomasgard f. 1929

Nordsida:

Døypte:
22/2 Birk Roset.
For. Terese Gausnes
og Alf Edvard Roset
16/3 Valentin Johan Hidalgo.
For. Anita Karin Myklebust
og Jorge Garcia Hidalgo

Vigde:
22/2 Terese Gausnes og Alf Edvard
Roset

Randabygd

Døypte:
2/3 Magnus Aaland.
For. Monja Johanne Tytingvåg
Aaland og Trond Aaland

Døde:
22/2 Selma Dorthea Nesdal f. 1921

Utvik

Døde:
2.4. Einar Frøyset, f. 1937
6.4. Ruth Loen, f. 1920
8.4. Harald Bruland, f. 1918

Innvik

Døde:
20.3. Oddvar Dagfinn Vanberg, f. 1941
11.5. Borghild Christensen, f. 1925

Olden

Døypte:
26.1. Ina Madelen Lyslo Kvamme.
For.: Jørn Andre Kvamme
og Anne Lyslo.
16.3. Olvia Opheim Flåten.
For.: Erik Flo Flåten og Silje-
Katrin Opheim.
(Døpt i Loen.)
25.5. Mia Henningsen Gjerde.
For.: Frode Gjerde og Tina
Henningsen.
(Døpt i Ljosheim.)
25.5. Alma Marie Gjertsen-Høgalmen.
For.: Nils Roger Høgalmen
og Hege Gjertsen.
(Døpt i Ljosheim.)

Døde:
25.12.13 Åsmund Tønning, f. 1934
5.1. Hjørdis Asgerd Agjeld, f. 1920
10.4. Kristen Halfdan Høgalmen,
f. 1929
15.4. Aslaug Borgny Strand, f. 1921
17.4. Kjellaug Sandnes, f. 1925

Sommerstemne!

Velkommen til Utvikfjellet søndag 3.
august 2014.
Breim og Utvik sokneråd inviterer
til sommerstevne på Utvikfjellet ved
Skihytta. Det er en tradisjon å samles
til gudstjeneste hver sommer, så også
i år.
Det blir et litt variert program.
Harald Runde står for preiken. Det
blir et historisk innslag av Dag Van-
berg og sang av barn.
Kaffe blir det også å få, så hjertelig
velkommen til en fin og berikende
søndags ettermiddag.

**Hilsen Utvik Sokneråd
v/Anne Karin Eriksen**


**Kyrkjedag i Nordfjord
laurdag 18. oktober
2014**

Biskop em. Gunnar Stålsett vert ho-
vudtalar. Han gjekk på gymnaset på
Eid og fekk si kristne omvending på
Eid. Han vert og med på gudstenesta
søndag.
Detaljert program kjem til neste
nummer av Kyrkjeklokka.
Merk dykk datoen alt no.



Statistikk for Stryn prestegjeld 2013 (2012)

Stryn prestegjeld	Oppstryn		Nedstryn		Loen		Sum	
Døyppte	10	(15)	22	(29)	6	(7)	38	(51)
Konfirmerte	9	(9)	50	(37)	10	(13)	69	(59)
Vigde	1	(4)	1	(1)	5	(3)	7	(8)
Gravferder	10	(7)	18	(18)	2	(5)	30	(30)
Gudstenester	17	(18)	39	(36)	17	(17)	73	(71)
Deltakarar ved gudst.	1564	(1347)	5648	(5125)	1226	(1249)	8438	(7721)
Nattverdgjester	172	(111)	941	(567)	144	(108)	1257	(786)
Offer/kollekt	35453	(30381)	101702	(85865)	29902	(25126)	167057	(141372)



Statistikk for Hornindal prestegjeld 2013 (2012)

Hornindal prestegjeld	Hornindal		Nordsida		Randabygd		Sum	
Døyppte	12	(10)	5	(4)	3	(3)	20	(17)
Konfirmerte	26	(17)	4	(5)	1	(0)	31	(22)
Vigde	2	(2)	1	(1)	0	(2)	3	(5)
Gravferder	12	(15)	5	(3)	2	(4)	19	(22)
Gudstenester	25	(25)	21	(19)	10	(14)	56	(58)
Deltakarar ved gudst.	2384	(3024)	1575	(1478)	613	(756)	5258	(5258)
Nattverdgjester	148	(282)	436	(391)	81	(59)	732	(732)
Offer/kollekt	70761	(61261)	62250	(67203)	10880	(13815)	142279	(142279)



Statistikk for Innvik prestegjeld 2013 (2012)

	Olden m /Ljosheim		Innvik		Utvik		Sum	
Døyppte	17	(4)	2	(4)	3	(1)	22	(9)
Døyppte, bor i soknet	10	(1)	0	(3)	1	(1)	11	(5)
Konfirmerte	13	(21)	5	(6)	3	(4)	21	(31)
Vigde	7	(2)	2	(1)	0	(0)	9	(5)
Gravferder	9	(7)	5	(6)	6	(5)	20	(18)
Gudstenester	28	(27)	19	(22)	16	(18)	61	(67)
Deltakarar v gudst.	2610	(3111)	1260	(1503)	935	(957)	4805	(5571)
Nattverdgjester	484	(519)	134	(190)	115	(72)	733	(781)
Offer/kollekt	97497	(68110)	34704	(44349)	42696	(43636)	174897	(150632)
Fasteaksjonen	13001	(15359)	11763	(9205)	9779	(8942)	34543	(28013)

Det var berre i alt 17 døypt i Olden kyrkje. Av dei 17, så var det 10 som hadde bustadadr. i Olden sokn. Men 2 barn, busett i Olden sokn, vart døypte i andre kyrkjer i Indre Nordfjord. 12 barn som har bustad i Olden sokn vart dermed døypte i Olden sokn. 2 barn som er busett i Innvik, vart døypte i andre kyrkjer i Nordfjord. Til saman var det 4 barn som vart døypte i Innvik sokn. Gjevargleda er stor i dei 3 sokna; Olden, Innvik og Utvik. Sett frå folketalet si side i bygdene, så er det Utvik som gjev mest.

Takk til Sigurd Stige

På siste soknerådsmøte hadde Hornindal sokneråd avskilsfest for Sigurd Stige. Han har vore vikarprest her sidan august 2012.

Sigurd har vore godt likt både som prest og som den personen han er, og ved kyrkja er det mange synlege teikn på at han er ein arbeidsmann. På dugnad har han fått bygd rullestolrampe, pussa opp båreromet, fått på plass varmepumpe i kyrkja og no til sist fått nye puter i benkane.

Før jul inviterte han til medarbeidarfest for sokneråd, friviljuge og tilsette. Der serverte han julemiddag med pinnekjöt og tilbehør, og so vart det dessert og kaker som andre hadde teke med.

Soknerådet vil takke Sigurd for den tida han har vore her og ynskje han lukke til vidare.



Over:
Soknerådsleiar Ole Andre Dahl overrekker ein Honndalsljà, laga av Svein Nesdal, og eit rosetre som minne frå Hornindal.

Til høgre:
Sigurd saman med soknerådet.



Under:
Sigurd saman med tilsette og sokneråd.



Velkomen tilbake til Mari Saltkjel med familie

Til sommaren er Mari med familie tilbake i Hornindal. Flyttelasset er på plass 26./27. juni, og då skal dei ha sommarferie i Hornindal slik at barna får bli litt meir kjent i bygda og heimen. Sverre (3) og Oddny (1) skal begynne i Hornindal barnehage, og Andreas skal for det meste vere heime for å ta seg av hus og familie. Mari er tilbake i tenesta 1. august og gler seg til det, kvar einaste dag.

Dei som vil komme på besök til store eller små i prestebustaden er hjarteleg velkomne. Dei har sakna å få uplanlagte besök i Stockholm og håper at folk föler seg frie til å banke på for ein kopp kaffe eller litt leik.

Tekst: Anne Lødemel Honningsvåg

Små og store frå Nordsida kyrkjelyd på tur til Herøy

Grillmat og havutsikt, busstur og Mor Monsen-kake, skjold og slag, bading og velsigning, barnegospelsong og historieformidling, preike i det fri og sol,- alt dette og meir til fekk vi oppleve vi som fekk høve til å seie ja-takk til invitasjonen frå Herøy kyrkjelyd søndag 1. juni.

Det var nesten som eit eventyr å spasere over brua og inn på denne vesle øya som vi nesten kunne femne om dersom vi gjekk i hop i lenke,- men som har vore så viktig for kyrkjelivet i denne delen av landet. Steinkyrkja som eingong stod her fann vi att steinane frå lenger nede mot sjøen. Det vart for lita kyrkjetomt då lova kom om at kyrkjehuset skulle romme 30 % av befolkninga som sokna til. No står det att eit altar og ein gravplass med klokketårn. Men det hindrar ikkje Ordet og songen i å lyde frå denne høgda ut mot havet. Nordsida barnegospel var av dei som var med å fylte opp bussen då nesten 50 Nordsidarar kom til messe på Herøy. Og koret song så det ljoma på tross av alle andre lydar som natur og småbåtar kan produsere. Ei av tilhøyrarane sa at dersom nokon klarar å vere sure etter å ha fått ein slik opptreden, så må det vere andre alvorlege grunnar til det. Desse borna set oss verkeleg i feststemning både med jubelsongen og med akrobatikken sin!

Etter gudstenesta flytta vi oss til andre sida av øya, til speleplatsen der grillane var opptente. Speleplatsen er eit flott miljø som er bygd opp for Herøyspelet som blir framført kvart år 1. helga i juli. (Tips til deg som ikkje har bestemt programmet den helga: Herøy-spelet på laurdag og Seljumannamesse på søndag). Med sol, godt humør og



Nordsida barnegospel song.

Borna fekk prøve skjold og hjelm frå Herøy-spelet.



litt fyr på kolet går grillinga fort og smertefritt! Godt pratlag og flott informasjon frå Martin Oskar Endresen gav tida innhald for dei vaksne.

Og borna: dei fekk prøve skjold og hjelm frå Herøy-spelet. Og ikkje minst: sunn-

møringane hadde varma opp sjøen såpass at dei yngste i følget bada med stor glede og høg lyd!

Kaffien og kakene som våre vener frå Herøy hadde laga til åt oss var fylte med omsorg. Det er eit utruleg godt kakefyll. For eigen del nytte eg kaffien frå øvste festplass-benkerada der eg såg nesten til Stadt. Det har stor verdi at kyrkjelydar møtest på denne måten! I fjor kom Herøy-folket på besøk til Nordsida og då kom tanken opp om ein gjenvisitt. Kanskje blir det knytte fleire venskapskyrkjelyds-band mot grannebispedømet no når vegen først er opna?

Tekst: Gunnhild Bergset

Foto: Magne Kristiansen



Unge og eldre samla om Ordet og songen.



Grilling.



Søndag er kyrkjedag

Gudstenester i Indre Nordfjord

Om det ikkje er gudsteneste i di kyrkje er du velkomen i nabokyrkja

20. juni; fredag

Olden gamle kyrkje 08:45 Skulegudsteneste
Innvik 10:00 Skulegudsteneste

22. juni; 2. s i treeiningstida – Matt. 3, 11-12

-Hornindal 11:00 Gudsteneste. Ved Knut Gjengedal
-Sundshaugen, Olden 14:00 Friluftsgudstenester. Ved Harald Runde
-Nedstryn 16:00 Gudsteneste. Ved Knut Gjengedal
-Innvik 16.00 Friluftsgudsteneste på den gamle kyrkjetomta på Hilde, der stavkyrkje stod. Ved Harald Runde.

29. juni; 3. s i treeiningstida – Luk. 14, 15-24

-Nedstryn 11:00 Gudsteneste. Ved Knut Gjengedal
-Nordsida 11:00 Gudsteneste. Ved Lars Ljosland
-Utvik 16:00 Gudsteneste. Ved Lars Ljosland

6. juli; 4. s i treeiningstida – Mark. 10, 17-27

-Selja, Selje 11:00 Seljumannamesse. Økumenisk gudsteneste i kloster-ruinane
-Loen Messefall
-Innvik Messefall

13. juli; 5. s i treeiningstida – Matt. 7, 15-20

-Nedstryn 11:00 Gudsteneste. Ved Knut Gjengedal
-Hornindal 11:00 Gudsteneste. Ved Lars Ljosland
-Olden 16:00 Gudsteneste. Ved Lars Ljosland

20. juli; Aposteldagen – Luk. 5, 1-11

-Oppstryn 11:00 Gudsteneste. Ved Lars Ljosland
-Utvik 11:00 Gudsteneste. Ved Knut Gjengedal
-Kvalen, Randabygd 14:00 Friluftsgudsteneste. Ved Lars Ljosland

27. juli; 7. s i treeiningstida – Luk. 15, 10-10

-Nedstryn 11:00 Gudsteneste. Ved Lars Ljosland
-Sølvbergstøylen, Nordsida 14:00 Friluftsgudsteneste. Ved Lars Ljosland
-Innvik 11:00 Gudsteneste. Ved Harald Runde

29. juli; Olsok – Joh. 12, 24-26

-Olden gamle kyrkje 19:30 Gudsteneste. Ved Harald Runde
-Oppstryn 20:00 Gudsteneste. Ved Erling Tronvik

3. august; 8. s i treeiningstida – Matt. 6, 19-24

-Utvik 14:00 Gudsteneste. Ved Harald Runde
-Svormuseet, Hornindal 12:30 Kultur-gudsteneste i museumsparken. Ved Mari Saltkjel
-Loen 18:00 Gudsteneste. Ved Harald Runde

10. august; 9. s i treeiningstida – Matt. 11, 28-30

-Nedstryn 11:00 Gudsteneste. Ved Mari Saltkjel
-Innvik 16:00 Gudsteneste. Ved Mari Saltkjel

17. august; 10. s i treeiningstida – Luk. 5, 27-32

-Olden 11:00 Gudsteneste. Ved Harald Runde
-Nordsida 11:00 Gudsteneste. Ved Mari Saltkjel
-Flofjellet, Oppstryn 12:00 Friluftsgudsteneste. Ved Beate Nes

24. august; 11. s i treeiningstida – Matt. 23, 37-39

-Nedstryn 11:00 Gudsteneste. Ved Knut Gjengedal
-Utvik 11:00 Gudsteneste. Ved Harald Runde

31. august; 12 s i treeiningstida – Matt. 6, 24-34

-Nesodden, Loen 11:00 Friluftsguds-

teneste. Ved Knut Gjengedal
-Hornindal 11:00 Gudsteneste. Ved Mari Saltkjel. Presentasjon av konfirmantane
-Ljosheim, Oldedalen 19:00 Gudsteneste. Ved Knut Gjengedal. Haustkveld med kyrkjekaffi på Yrineset etter gudstenesta

7. september; 13. s i treeiningstida – Matt. 25, 14-30

-Nedstryn 11:00 Gudsteneste. Ved Knut Gjengedal. Presentasjon av konfirmantane
-Innvik 11:00 Gudsteneste. Ved Harald Runde. Presentasjon av konfirmantane
-Randabygd 11:00 Gudsteneste. Ved Mari Saltkjel. Presentasjon av konfirmantane

14. september; 14. s i treeiningstida – Matt. 20, 1-16

-Oppstryn 11:00 Gudsteneste. Presentasjon av konfirmantane. Ved Harald Runde
-Olden 11:00 Gudsteneste. Ved kateket Beate Nes. Presentasjon av konfirmantane
-Nordsida 11:00 Gudsteneste. Ved Mari Saltkjel. Presentasjon av konfirmantane

21. september; 15. s i treeiningstida – Matt. 7, 38-37

-Nedstryn 11:00 Misjonsgudsteneste. Ved Knut Gjengedal. Kyrkjekaffi
-Utvik 11:00 Gudsteneste. Ved kateket Beate Nes. Presentasjon av konfirman-tane
-Hornindal 11:00 Hausttakkefest. Ved Mari Saltkjel. Utdeling av 4 og 6 årsbok

28. september; 16. s i treeiningstida - Mark. 7, 31-37

-Loen 11:00 Gudsteneste. Ved Knut Gjengedal. Presentasjon av konfirman-tane
-Innvik 11:00 Hausttakkefest. Ved Harald Runde. Utdeling av 4 årsbok og Bibel.

Sommarleirane 2014 på Nesholmen

Sommaren nærmar seg og det er igjen tid for å tenke på kva DU skal gjere i sommarferien! Vil du vere med på leir kanskje?

Sogn og Fjordane KFUK-KFUM arrangerer tre sommarleirar for born på Nesholmen til sommaren. Sommarleir 1 og 3 er for 1.-4. klasse og Sommarleir 2 er ein fire dagars leir for 5.-7. klasse. Her er det mange kjekke ute- og inne aktivitetar. Alle leirane er fulle av program som bading, kanopadling, gudstenesteverkstad, deltakar-kveld og mykje moro. Kvar kveld roar vi tankane med ei stemningsfull kveldsavslutning. Her kan alle born melde seg på og få ein super start på sommaren! For påmelding, gå inn på www.kfuk-kfum.no og søk etter din Sommarleir!

SOMMARLEIR 1

Tid: 20. -22. juni

Alder: 1.-4. klasse

Stad: Nesholmen leirstad i Gloppen (50 min. frå Førde/ Florø og 1 t. frå Sandane)

Pris: kr 750,- for medlem i KFUK-KFUM 850,- for ikkje medlem

E-post: sfj@kfuk-kfum.no

SOMMARLEIR 2

Tid: 24.-27. juni

Alder: 5.-7. klasse

Stad: Nesholmen leirstad i Gloppen (50 min. frå Førde/ Florø og 1 t. frå Sandane)



Padling høyrer med på leir på Nesholmen.

Pris: 900,- for medlem i KFUM-KFUM 1000,- for ikkje medlem

E-post: sfj@kfuk-kfum.no

SOMMARLEIR 3

Tid: 27.-29. juni

Alder: 1.-4. klasse

Stad: Nesholmen leirstad i Gloppen (50 min. frå Førde/ Florø og 1 t. frå Sandane)

Pris: 750,- for medlem i KFUK-KFUM 850,- for ikkje medlem

E-post: sfj@kfuk-kfum.no

Som vaksen er du hjarteleg velkommen til å vere leiar saman med oss!

Velkommen på leir!

Sommarleirane på Fjordly

Også på Fjordly er det fleire sommarleirar. Her er datoane:

13.-15. juni: Minileir, 4-8 år m/følgje.

22. -25. juni: Sommarleir 1, 4.-5. kl.

29. juni-2. juli: Sommarleir 2, 6.-7. klasse

9.-13. juli: Tenleir, 13-19 år

25.-27. juli: Familieleir

15.-16. aug.: Dugnadshelg

Kontakt regionskontoret for informasjon og påmelding: acta.sof@normisjon.no, eller på tlf.: 57 86 63 49, 92 04 63 49, 48 99 23 42. Påmeldingsfrist ei veke før leirstart.

Leirstart/innkvartering første dag: kl. 18.00-18.45. Avslutningsmøte siste dag kl. 15.00 (gjeld leirar t.o.m. 7. klasse). Heile familien er velkomen til avslutningsmøtet!



Det kan bli regnfullt på leir.

KAFFEKROKEN



Neste nummer vert distribuert i posten 11. september. Redaktør for det er Olav R. Faleide. Stoff kan sendast på e-post til post@kyrkjeklokka.no innan 15. august.